

## 2 Tilmolseiq

### *Gevq-a nail gaq*

Haoqgavq niil keiv iqmoeq ilmoeq bhai Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq jemao iqsanl, Paolluv-i mail gevq-a nail ngaol dai, noeq nail ngaol.

### *Gevq-a nail aqyanq khi aqduq*

Gevq-a nail aqyanq neq, A.D. 66-67 kovq bhai ngaol. Gevq-a nail aqduq neq, Paolluv Lolmav meeq nail thaonq bhai nvq pov teevq pov bhiq nieivq bhoel-u phao, gevq-a nail ngaol. Paolluv Lolmav nail thaonq bhai iqmoeq-u khe pov aol-u phao neq, thoi dai dai-ail maq haq-al. Thailhai ngaol-aq, niil thal khe pov neq, heeqphaq Neiqqlol-i mail thaonq bhai bhi laol khi, haq deede-a nail ngaol.

### *Khaq sil gaq bhai gevq bhiq-a nail*

Haoqgavq niil keiv neq, Tilmolseiq bhai gevq bhiq-a nail ngaol. Tilmolseiq neq, Luldaqlal meeq yaq ngaol. Tilmolseiq dai ge nail dao-qceevq neq, Miqyail bhai tsiqeeq tsiqheel nail dai, ge movq nail ngaol. Aivq nail aqma neq, Khali yaq pevq nail Yuldav tsaol-aq Ulnil dai mil khi, aivq nail aqbhu neq, Heiqlaqsal tsaol-aq ngaol. Aivq yaqnoil-ail jlav-u nee mail Jalliq aqlil heeq nia nail ngaol. Yuldav tsaol-aq nee mail ganl nl tavq nia dai Paolluv-i mail bavkov uqjaq oev bhiq-a nail ngaol. Tilmolseiq neq, gaqkhoel

tse! nvq gaq nail lavqkhoel bhai maq aol-ail. Aivq neq, Khali yaq munl juq bhai heldaiq phail khi Paolluv bhai ganl nl tsao bhiq nail teevq gaq ngaol.

*Khul bhai noeqthunq khi gevq-a nail*

Haoqgavq niil keiv neq, Paolluv Tilmolseiq bhai aivq jaol nail bha bhi nalga lee movq-ai bhiq nail ngel-i mail, gevq-a nail ngaol. Khul khi mail dai ngal neq, Aqsil-aq milkhaoq bhai jaol nail tsaol-aq iqsanl mail aivq bhai khaonq ha-a nail ngaol. Deiqmav neq, miltsaq niilniai gaiq-a nail ngel-i mail, aivq bhai khaonq ha-ail ceevq khi Theilsaqlolni meenq bha ail-a nail ngaol. Gaqleiqgeiq neq, Gaqlaqtil milkhaoq bhai lai-a nail ngaol dai, ge nail ngaol. Tiltuv iqsanl, Daqlaqmaqdil milkhaoq bhai ail-a nail ngaol. Lulkavq taivq-ail, aivq nee mail jaol nail ngel-i mail, Tilmolseiq bhai iqsanl bhi lee movq-ai bhiq nail ngaol. Lavqtsail mail lee yaoq dai, nvq pov kev dai, ge bhiq-a ngaol.

Al ovqtavq, Heeqphaq Neiqlol khoeq dee jiovq deede nail bhai ya daq thailthaiq-u phao, ivq-dao dai, jaol yaoq. Lavqkhiq tsail nail geeqlaoq daoq aqmeeq-ai cavq yaoq dai iqsanl, gaq bhiq nail haqbhoil, gevq bhiq-a nail ngaol.

*Iqmoeq ilmoeq khe daoq*

<sup>1</sup> Ngal neq, Yeiqsul Khali nail gaqkhoel Paolluv ngaol. Miqyail neema tsaq nail ngel-i mail, ngal gaqkhoel jiovq thailthaiq nail ngaol. “Yeiqsul Khali bhaqda nee aqdoevq ya doevq nail ngaol

dai, jaq-ai thaq nail saljial al cavq bhiq yaoq” dai, Miqyail ngaq bhai khoel nail ngaol.

<sup>2</sup> Ngal mao-ail gaiq-a nail ngaq nail yaqyov Tilmolseiq bhai haoqgavq niil gevq bhoel-ai lavq-a nail ngaol. Aqbhu Miqyail khi ngadao nail Heeqphaq Yeiqsul Khali nail geeqlaoq eeljaol, gaoqhaq gaiq-a nail pha q khi, neesal-ovq nail pha q naoq nail kovtavq bhai bhi jia v dei-eiq.

*Yeiqsul nail haqbhoil salkhil khanq nail bhai tha q haqsil*

<sup>3</sup> Ngal geeqlaoq khal hal-u phao, nqkiv n-gaol maqkhaiq, khaq mao iqsanl naoq nail haqbhoil maq nioil peivq dai hal khi, Miqyail bhai tsiqeeq naol. Ngaq nail aqphiq aqbhal juq oeqbal tha q duq maq ya nail heeq nia nail neema aol aol-ail, aivq nail haqbhoil ganl nl nail khe-ai, ngal iqsanl ganl nl nail ngaol. <sup>4</sup> Naol ngaq bhai noeq moel nail bhaqda nee, maivbhil dov-a nail ngaol dai, ngal noeq dov lal-u phao, naoq bhai moel movq deede-e-ail nial. Naoq bhai ya moel haq neq, ngal lavqkhiq tsail deede lal nail ngaol. <sup>5</sup> Naol maldil neema thaqtsaol nail bhai, ngaq bhai noeq dov lal-ail nial. Naol neema thaqtsaol nail al neq, iqmoeq-u phao naoq nail aqphiq Laol-il khi naoq nail aqma Ulnil nail lavqkhoel bhai aol khi, niil aq-il naoq nail lavqkhoel bhai aol nail bhai, ngal heeq kivq nail ngaol. <sup>6</sup> Alheel ngel-i mail, ngal naoq bhai niailhai ge noeq bhiq movq nail ngaol. Ngaq-i mail naoq nail kovtavq bhai aqlavq bavq dav-u phao, naol Miqyail nail kovpavq ya-a nail ngaol. Miqjaq sivtovq nail khe-ai, kovpavq al bhai sivtovq yaoq. <sup>7</sup> Khul khi mail dai ngal-aq

neq, Miqyail ngadao bhai geesil nail neema bhi aol lavq-a nail maq ngel-ail. Bhaqaoq aol nail neema, goil nail gaiq-a nail neema khi, yovqgavq nail aqmaol bhai gaq lai q nail neema bhi aol lavq-a nail ngaol.

<sup>8</sup> Alheel ngel-i mail, ngadao nail Heeqphaq Yeiqsul nail haqbhoil salkhil khanq nail, thaq haqsil. Aivq nail haqbhoil nee ganl nl nail ngel-i mail, thaonq bhai ya aol thailthaiq nail ngal bhaqda nee iqsanl thaq haqsil. Miqyail-i mail naoq bhai gaq bivq-ai thaq nail khe-ai, ngaq-ai nee mail teevq gaq khe-ai, lavqkhiq tsail nail geeqlaoq daoq nail haqbhoil khoeq nail jio vq nail pha q bhai da q yaoq. <sup>9</sup> Miqyail neq, aivq-i mail noeqceiv-ai tha q nail khe-ai pevq lal dai, ngadao bhai hevqkovq lavq khi, aqmeeq aqhaol nail lavqkhoel bhai doevq yaoq dai, ngadao bhai khul-ai tha q nail ngaol. Ngadao teevq pha q ganav nl-ai hal-ai tha q nail ngel-i mail, aivq alhai nl lavq-a nail maq ngel-ail. Geeqlaoq eeljaol bivq lavq-a nail ngaol. Geeqlaoq eeljaol al neq, nqtavq miltsaq maq jia v lee-u nee mail, Yeiqsul Khali bhai juq khi, aivq ngadao bhai bivq lavq-a nail ngaol. <sup>10</sup> Ngadao nail Hevqkovq nail ga q Yeiqsul Khali dov lee-a nail ngel-i mail, niil aq-il geeqlaoq eeljaol al bhai ngadao bhaqlaoq kheq dai, ya moel-a nail ngaol. Aivq neq, sil nail pha q bhai lav cov khi, aqdoevq doevq nail pha q khi ma q luq ma q seil-ail nia nail pha q, lavqkhiq tsail nail geeqlaoq daoq lavqkhoel nee bhaqlaoq kheq dai, bhi dov lee-a nail ngaol. <sup>11</sup> “Lavqkhiq tsail nail geeqlaoq daoq niil nail haqbhoil daoq cavq cavq nail ga q jio vq yaoq. Al ovqtavq, gaqkhoel khi

cavq bhiq cov bhiq nail saqlaq iqsanl jiovq yaoq” dai, Miqyail ngaq bhai tsel dov lavq-a nail ngaol. <sup>12</sup> Alhai tsel dov lavq-a nail bhaqda nee ngal niailhai ya daq thailthaiq nail ngaol. Thailhai ngaol-aoq, ngal maq haqsil. Khul khi mail dai ngal-aq neq, ngaq-i mail neema thaqtsaol nail gaq bhai ngal heeq kivq nail ngaol. Ngaq-i mail aivq bhai khal av bhiq-a nail juq, yalkhaq dal nail aqn bhai kev dai, aivq oiltsail-ai thaq nail ngaol dai, ngal heeq kivq nail ngaol.

<sup>13</sup> Ngaq-i mail cavq bhiq cov bhiq-a nail maldil tsaq nail daoq bhai saol oil yaoq. Ngadao Yeiqsul Khali bhai tavq nail ngel-i mail, ya-ai thaq nail neema thaqtsaol nail pha q khi goil nail gaiq-a nail pha q nail haoqnao doel-aivq yaoq. <sup>14</sup> Naoq bhai av bhiq-a nail, meeq deede nee nail juq bhai, ngadao nail lavqkhoel khe jaol nail Meeqnaol Haolnail Aqhaqlal bhai juq khi aqmeeq-ai oil tsail-ai thaq yaoq.

*Paolluv bhai khaonq ha nail juq khi maq khaonq ha nail juq nail ganl*

<sup>15</sup> Naol heeq nia nail khe-ai, Aqsil-aq milkhaoq bhai jaol nail tsaol-aq iqsanl mail ngaq bhai khaonq ha-a nail ngaol. Philgeiqlul khi Heiqlaq-moljeiq iqsanl, tsaol-aq al juq nail lavqkhoel bhai aol nail ngaol.

<sup>16</sup> Aoqneiqliqphaol aqyu pha qyaq mayaq nail kovtavq bhai Heeqphaq Yeiqsul nail gaoqhaq gaiq-a nail pha q bhi jia v dei-eiq. Aivq ngaq bhai mee nia pov aqsal bhi sal lal-a nail ngaol. Ngaq bhai hailcav pheethaiq-ai thaq nail bhai aivq maq haqsil-ail. <sup>17</sup> Aivq Lolmav meenq bhai

lal kev-u phao, ngaq bhai moel-u phao kev dai, halpov deedee-a nail ngaol. <sup>18</sup> Aivq neq, yalkhaq dal nail aqn n-gaol, Heeqphaq Yeiqsul aivq bhai gaoqhaq gaiq-a bhiq dei-eiq. Ngal Eilpheilsu meenq bhai jaol-u phao, aivq ngaq bhai khadai tsoajao-ai lavq-a nail bhai naol heeq nia nail ngaol.

## 2

### *Yeiqsul Khali nail haqbhoil genl dev nail juq*

<sup>1</sup> Ngaq nail yaqyov-ol, Yeiqsul Khali nail geeqlaoq eeljaol lavqkhoel nee gaq kav lal yaoq. <sup>2</sup> Salkhil khanq nail tsaol-aq maodai gaq nail sivtavq bhai ngaq-i mail cavq bhiq cov bhiq-a nail juq, naol ya gaiq-a nail ngaol. Saljial ivq khi yu bhai cavq bhiq cov bhiq nia nail tsaol-aq bhai, daoq al juq av bhiq yaoq. <sup>3</sup> Yeiqsul Khali nail haqbhoil mao-ail meeq nail genl dev nail gaq jiovq nail khe-ai, naol ngaq-ai nee mail khoeq nail jiovq nail phaqaq bhai daq yaoq. <sup>4</sup> Genl dev nail tsaol-aq khul gaq maqkhaiq, yovqgavq nail aqivq gaq neekhaol sil dai nl movq nail ngel-i mail, yovqgavq nail nl jaq keiv daol nail ganl bhai maq suqsaq-ail. <sup>5</sup> Tsaq doel pheeljaq nail bhaoqaiq lavqkhoel, tsaq doel pheeljaq nail tsaol-aq aivq nail aolsaolkovq jiaq nail khe-ai maq tsaq haq neq, gaq lai nail heel uqtsaqaq kovpavq aivq bhai maq bivq-ail. <sup>6</sup> Laijai khi yalgaol nl nail tsaol-aq, aqheeq allu iqmoeq ilmoeq ya jaq nail ngaol. <sup>7</sup> Ngal ge nail bhai saol-nvq daiq. Khul khi mail dai ngal-aq neq, yaoq

phaq yaoq-ao nee bhai naol heeq nia dai, Miqyail naoq bhai neenoeq neekha bivq lavq nail ngaol.

<sup>8</sup> Ngaq-i mail lavqkhiq tsail nail geeqlaoq daoq cavq-ai thaq nail khe-ai, Daqbhil nail jeq-e jaq-a pevq nail, sil khi doevq kovq lal-a nail Yeiqsul Khali bhai, thaq nioil peivq dei-eiq. <sup>9</sup> Lavqkhiq tsail nail geeqlaoq daoq al daoq cavq-a nail bhaqda nee, hageiv nail tsaol-aq teevq gaq bhai phee nail khe-ai, ngaq bhai phee lavq khi, haq dee aoq deede nee nail pha q bhai ngal ya daq thailthaiq nail ngaol. Thailhai ngaol-aoq, Miqyail nail daoq bhai teevq gaq-ail maq pheethaiq nia-ail. <sup>10</sup> Alheel ngel-i mail, tsel dov-ai thaq nail tsaol-aq bhai iqsanl, Yeiqsul Khali nail lavqkhoel bhai aol nail hevqkovq nail pha q ya dai, ngal yaoq pha q yaoq-ao nee bhai ol nail ngaol. Hevqkovq nail al pha q nee mail teevq gaq khe-ai, nqmaq maqluv halyeel nail seiqleiq khaosail iqsanl ya nail ngaol.

<sup>11</sup> Daoq niil daoq neq saljial ivq nail ngaol:  
 Ngadao aivq nee mail  
 sil haq neq,  
 aivq nee mail aqdoevq  
 ya doevq nail ngaol.

<sup>12</sup> Ngadao ol haq neq,  
 aivq nee mail ya  
 uvthaiq nail ngaol.  
 Ngadao aivq bhai  
 khaonq ha haq neq,  
 aivq iqsanl ngadao bhai  
 khaonq ha nail ngaol.

<sup>13</sup> Ngadao saljial  
 maq ivq khi ngaol-aoq,

aivq saljial ivq nail ngaol.  
 Khul khi mail dai ngal neq,  
 aivq-i mail  
 ge-ai thaq nail saljial bhai  
 aivq maq khaonq ha-ail.

*Miqyail neema tsaq nail khe-ai ganl nl nail gaq*

<sup>14</sup> Ganl al juq aqivq jaqbheq juq bhai ge noeq bhiq yaoq. Daoq juq nail ganl nee thaq jil pheeljaq dai, Miqyail nail sivtavq bhai aqyu juq bhai mailma-ail cavq bhiq yaoq. Alhai jil pheeljaq nail neq, khul teevq phaqa-ail ganl maq tsoiq nail nee ovqtavq, ya gaiq nail tsaol-aq bhai bhi cov ail nail ngaol. <sup>15</sup> Naol neq, haqsil duq maq jiav dai, maldil tsaq nail daoq daolcoev dai, cavq bhiq nia nail gaq pevq nail nee ovqtavq, Miqyail neema tsaq nail khe-ai ganl nl nail gaq pevq lal dai, laijai deedee yaoq. <sup>16</sup> Miqyail bhai maq ev dai, ganl maq tsoiq nail daoq bhai gail jao jao yaoq. Khul khi mail dai ngal-aq neq, alhai ganl maq tsoiq nail daoq ge nail tsaol-aq neq, Miqyail bhai maq ev nail neema teevq pov nee teevq pov mao jaiq lal nail ngaol. <sup>17</sup> Aqyu juq-i mail cavq bhiq cov bhiq nail juq neq, malyal bhaol-ail nail malkhoeq khe-ai, dul nail ngaol. Aqyu juq nail lavqkhoel bhai Huqmiqnail khi Phillail iqsanl aol nail ngaol. <sup>18</sup> “Ngadao doevq kovq lal nail phaqa neq, jel ail-aoq nail ngaol” dai, aqyu nvq gaq ge ge-ail khi, maldil tsaq nail phaqa bhai gail bheeq bheeq nail ngaol. Aqyu nvq gaq neq, tsaol-aq teevq pav ganav juq nail neema thaqtsaol nail phaqa bhai lav cov nail ngaol. <sup>19</sup> Thailhai ngaol-aoq, Miqyail-i mail



kaovq-ai thaq nail daoqthaoq neq, ivq deedee nail ngaol. “Miqyail neq, aivq nail tsaol-aq bhai heeq nia nail ngaol.” “Miqyail nail aqmil bhai juq nail yaoq gaq yaoq-ao nee maq tsaq maq daol nail pha q bhai khaonq ha yaoq” dai, daoqthaoq al bhai junq deeq-ai thaq nail ngaol.

<sup>20</sup> Ilkhaol il ma nail lavqkhoel-ai, phul heel-i mail teivq-ai thaq nail nlmaoq taivq-ail jia v nail maq ngel-ail. Aqbhaol-i mail lav sav-ai thaq nail khi miltsaq-i mail teivq-ai thaq nail juq iqsanl jia v nail ngaol. Nlmaoq teevq pav ganav juq neq, bhaoaqia q lav sav-u phao taivq-ail yuq khi, teevq pav ganav juq neq, yaoq n yaoq n nee yuq nail ngaol. <sup>21</sup> Pultavq phao gevq-ai thaq nail aqjii vq aqcavq al juq bhai yovqgavq nail neema lavqkhoel bhai yovqgavq khaonq ha haq neq, ilheel gaq yuq nia nail meeq nail haol nail nlmaoq pevq lal nail ngaol. Al ovqtavq, aqmeeq yaoq pha q yaoq-ao nee bhai nl nail haqbhoil, lainq-ai thaq nail, aqphoiq mao-ail phoiq khi ganl tsoiq nail nlmaoq iqsanl pevq lal nail ngaol.

<sup>22</sup> Ya qnoil juq-i mail aqsivq haqjoil phao nee tavq nail neekhaol sil nail pha q bhai, naol gail jao jao yaoq. Neema aqhaol haol deel aol khi, Miqyail bhai hal nail tsaol-aq nee mail, tsaq nail daol nail pha q, neema tha qtsaol nail pha q, goil nail gaiq-a nail pha q khi, tsaq lai jil lai nail pha q nail haoqnao aqmeeq-ai tsaothel-aivq yaoq.

<sup>23</sup> Neeno eq neekha ma q aol-ail, khul teevq pha q-ail ganl ma q tsoiq dai, jil pheelja q nail bhai iqsanl, gail jao jao yaoq. Khul khi mail dai ngal-aq neq, jil pheelja q nail al neq, iqdaiq iqtsai bhi dov lal nail ngaol. <sup>24</sup> Miqyail nail ganl nl nail

tsaol-aq neq, jil pheel jil lul jaq nail tsaol-aq maq ya pevq-ail. Aivq neq, tsaol-aq iqsanl bhai neema neenuq neebeiv aol nail tsaol-aq, cavq bhiq cov bhiq nia nail tsaol-aq khi, ol nia nail tsaol-aq ya pevq nail ngaol. <sup>25</sup> Yovqgavq-i mail cavq bhiq nail bhai neema maq tsaq nail tsaol-aq bhai, neema neenuq neebeiv aol nail lavqkhoel cavq bhiq nia nail tsaol-aq iqsanl ya pevq nail ngaol. Alhai cavq bhiq ha neq, al gaq maldil tsaq nail pha q bhai heeq nia lal khi, oeqbal noeq pov lal dai, Miqyail nl bhiq-ail meeq. <sup>26</sup> Al ovqtavq, aivq nail neenoeq khe-ai bhi nl nail dai khi, neivq heeqphaq-i mail aqyu juq bhai khail phee-ai tha q khi ngaol-aq, aqyu juq noeq lal khi aivq nail lavq phee lavqkhoel nee ya jel-ail nail ngaol.

### 3

*Haoqnao naosaq khe aqn aqyanq bhai tsaol-aq yaq nail neema lavqkhoel-ai khalhai pevq lal nail ganl*

<sup>1</sup> Haoqnao naosaq-u phao, haq dee aoq deede nail aqyanq kev lee nail ngaol dai, heeq kivq tha q-ai yaoq. <sup>2</sup> Khul khi mail dai ngal-aq neq, tsaol-aq yaq niailhai pevq lal nail ngaol. Yovqgavq nail aqmaol bhai gaiq-a nail, phul bhai neekhaol jiav nail neema aol nail, khal ge movq-ail ge nail, neema eeq nail, yovqgavq nail aqmaol bhai yovqgavq tha qeeq nail, aqbhu aqma nail daoq maq naldaiq nail, yu nail geeqlaoq bhai maq noeq nail nee ovqtavq, maq meeq maq haol nail tsaol-aq pevq lal nail ngaol. <sup>3</sup> Al ovqtavq, yu bhai maq gaiq-a nail, yu nail oeqbal bhai maq

phaiq bhiq nail, yu nail haoqnaol phao nee ge doil nail, yovqgavq nail neema bhai maq gaq lai nail, mao-ail haqev nail khi aqmeeq pha q bhai neejlav jlav nail tsaol-aq iqsanl pevq lal nail ngaol. <sup>4</sup> Aqyu juq neq, saljial maq ivq nail, khul teevq pha q-ail maq saol-nvq dai nl nail, neema eeq deedee nail, Miqyail bhai maq gaiq-a mail, miltsaq phao lavqkhiq tsail lal nail juq bhai gaiq-a nail tsaol-aq iqsanl pevq lal nail ngaol. <sup>5</sup> Aqyu juq neq, lavqniil phao taivq-ail Miqyail bhai ev nail aol thaoq nail ngaol. Lavqkhoel phao neq, aol al bhai tavq nail bhaqaoq teevq peivq-ail maq aol nail tsaol-aq ngaol. Alheel nail tsaol-aq bhai gail jao jao yaoq.

<sup>6</sup> Aqyu juq nail lavqkhoel bhai teevq pav ganav juq neq, yu nail ilkhaol bhai aol lai khi, neenoeq neekha maq aol nail yaqmai-aq juq bhai aqyu juq nail aqlavq lavqkhoel bhai aol lee dai, jalmul mul nail ngaol. Yaqmai-aq al juq neq, oeqbal maodai phi khi, aqsivq haqjoil phao nee tavq nail neekhaol sil nail mee nia pha q aqyu juq bhai hel-aivq nail ngaol. <sup>7</sup> Aqyu juq neq, khaq mao iqsanl, yu saol bhiq nail bhai saol oil khi ngaol-aq, maldil tsaq nail daoq bhai, maq heeq nia lal-ail. <sup>8</sup> Yaqneiq khi Yaqbheiq, Molseiq-i mail cavq nail daoq bhai lav tsoiq deedee nail khe-ai, jalmul mul nail tsaol-aq al juq iqsanl maldil tsaq nail daoq bhai lav tsoiq deedee nail ngaol. Aqyu juq nail saol-nvq nia nail neema gaol li cevq dai pevq-ail khi, aqyu juq nail neema thaqtsoal nail pha q bhai laonqdaiq-u phao, sunq-ail nail ngaol. <sup>9</sup> Aqyu juq neq al bhai dee lai nail ngaol. Khul khi mail dai ngal-aq neq, tsaol-aq al nvq gaq neenoeq

neekha maq aol ail dai bhaqlaoq kheq dai dov  
lal-a nail khe-ai, tsaol-aq niil juq neenoeq neekha  
maq aol nail iqsanl, tsaol-aq iqsanl nail sivtavq  
bhai bhaqlaoq kheq dai, dov lal nail ngaol.

*Tilmolseiq bhai Paolluv-i mail saol bhiq-a nail ganl*

<sup>10</sup> Naol ngaq nail ganl heeq nia nail ngaol. Ngal cavq nail cov nail, ngal nl nail hal nail, ngaq nail noeqthunq nail, ngal neema thaqtsaol nail, ngal neenoeq heelma ma dai noeq nail, ngal goil nail gaiq-a nail khi ngal oltsaol nail, naol niil juq bhai heeq nia nail ngaol. <sup>11</sup> Ngal khoeq nail jiovg nail pha q khi haq nail aoq nail pha q bhai ya daq nail ngaol dai iqsanl, naol heeq nia nail ngaol. Aqdil-aoq meenq, Ilgaolnil meenq khi, Luldaqlal meenq, meenq al juq nail lavqkhoel bhai jaol-u phao, ya daq deedee-a nail ngaol. Thailhai ngaol-aoq, khoeq lavq jiovg lavq nail al juq iqsanl nail lavqkhoel-ai, Heeqphaq Yeiqsul ngaq bhai bhi jel-ail lavq-a nail ngaol. <sup>12</sup> Maldil dai ge haq neq, Yeiqsul Khali bhai juq juq-ail Miqyail bhai ev nail tsaol-aq iqsanl mail, khoeq nail jiovg nail bhai ya daq nail ngaol. <sup>13</sup> Hageiv nail tsaol-aq khi goiqbhaoq khoiqbhaoq bhaoq nail tsaol-aq teevq pov nee teevq pov gaoq hageiv jaiq lal nail ngaol. Aqyu juq yu bhai hevq bheel-aivq khi yu iqsanl aqyu juq bhai hevq bheel-aivq nail ngaol.

<sup>14</sup> Thailhai ngaol-aoq, naol ya saol khi neema thaqtsaol nail pha q bhai ivqdao dai, nieivq thaiq-ai tha q yaoq. Khul khi mail dai ngal-aq neq, naol khaq sil gaq bhai saol oil-a nail dai, naol heeq kivq nail ngaol. <sup>15</sup> Al ovqtavq, naol neq, yaqkhaq

yaquv-ail jiav-u nee mail, meeq nail haol nail Jalliq bhai heeq nia nail ngaol. Jalliq al neq, Yeiqsul Khali bhai neema thaqtsaol nail ngel-i mail, naol hevqkovq nail pha q ya dai, neenoeg neekha bivq nia nail ngaol. <sup>16</sup> Miqyail-i mail bhi noeq dov-a nail ngel-i mail, Jalliq iqsanl mail gevq dov-ai tha q nail ngaol. Jalliq neq, cavq bhiq cov bhiq nail, oeqbal phaodaiq bhiq nail, gaoq bhi meeq lal nail pha q khi, aqmeeq aqhaol dai, doevq nia nail haqbhoil ganl tsoiq nail ngaol. <sup>17</sup> Al bhaqda nee, Miqyail nail tsaol-aq, yaoq pha q yaoq-ao nee bhee lovq nail tsaol-aq pevq nail nee ovqtavq, aqmeeq pha q yaoq pha q yaoq-ao nee nl nail dai khi, lainq-ai tha q nail tsaol-aq pevq lal nail ngaol.

## 4

### *Miqyail nail daoq aqmeeq-ai cavq bhiq yaoq*

<sup>1</sup> Miqyail nail sivatvq bhai maqkhaiq, aqdoevq doevq nail tsaol-aq khi sil nail tsaol-aq bhai yalkhaq dal nail Yeiqsul Khali nail sivatvq bhai maqkhaiq, aivq dov lee khi uvthaiq nail bhai ngal juq juq-ail, naoq bhai daoq nialhai bivq nail ngaol. <sup>2</sup> Miqyail nail daoq cavq bhiq yaoq. Aqyanq tsaq maq tsaq khi ngaol-aq, cavq bhiq yaoq. Aqyu juq-i mail nl lai q tha q nail juq bhai tsiqtsoe bhiq khi, yaqhao thailhai tha q gaoq nl dai, daoq bivq khi gaq iqsanl bivq yaoq. Ol ol-ail cavq bhiq cov bhiq yaoq. <sup>3</sup> Khul khi mail dai ngal-aq neq, mao-ail meeq mao-ail bhee nail daoq cavq nail bhai maq naldaiq nail yanq kev lee nail ngaol. Aqyu juq neq, khul nail ganl

iqsanl gaiq movq khi, aqyu juq neema tsaq nail khe-ai, cavq lavq cov lavq nail saqlaq mee nia gaq bhai aqyu juq nee mail bhi jaol nail ngaol. <sup>4</sup> Yu maldil tsaq nail daoq cavq bhiq-u phao, aqyu juq yaoq phao yaoq tsiqphaol khi, gangje taivq-ail naldaiq nail ngaol. <sup>5</sup> Thailhai ngaol-aq naol neq, yaoq pha q yaoq-aq nee nail lavqkhoel-ai yaolphaol nia nail tsaol-aq pevq yaoq. Khoeq lavq jiovq lavq nail pha q bhai daq yaoq. Lavqkhiq tsail nail geeqlaoq daoq cavq bhiq thailthaiq yaoq. Naol nl thail hal thailthaiq nail Miqyail nail ganl juq nl gil-u phao kev dai, aqmeeq-ai nl yaoq.

<sup>6</sup> Khul khi mail dai ngal-aq neq, laol duq kov-tavq bhai hoeldav hoeldav-ail laol bhiq nail pha q khe-ai dul dai, niil aq-il ngal ya daq thailthaiq nail ngaol. Ngal kovq lai nail aqyanq aqjail jail lal-aq nail ngaol. <sup>7</sup> Ngal neq, aqmeeq-ai laijai-a nail ngaol. Tsaq doel pheeljaq nail pha q bhai haoqnao naosaq-u n-gaol kev dai, tsaq-a nail ngaol. Neema thaqtsaol nail pha q bhai ivqdao dai, nieivq thaiq-ai tha q nail ngaol. <sup>8</sup> Niil aq-il iqsanl, tsaq nail daol nail heel uqtsaoq ngaq nail haqbhoil lainq-ai tha q nail ngaol. Aqn al n neq, tsaq nail daol nail lavqkhoel nee yalkhaq dal nail Heeqphaq Yeiqsul neq, uqtsaoq al tsaq ngaq bhai bivq lavq nail ngaol. Ngaq bhai taivq-ail maq ngel-ail. Aivq dov lee nail bhai khal noeqthunq nail tsaol-aq juq bhai iqsanl, bivq nail ngaol.

*Paolluv Tilmolseiq bhai hal nail ganl*

9 Naol ngal jaol nail bha lavqtsail mail lal kivq dai, laijai yaoq. 10 Khul khi mail dai ngal-aq neq, Deiqmav neq, miltsaq niilniai gaiq-a nail ngel-i mail, ngaq bhai khaonq ha-ail ceevq khi, Theilsaqlolni meenq bha ail-a nail ngaol. Gaqleiqgeiq neq, Gaqlaqtil milkhaoq bhai lai-a nail ngaol. Tiltuv iqsanl, Daqlaqmaqdil milkhaoq bhai ail-a nail ngaol. 11 Lulkavq taivq-ail ngaq-ai nee jaol nail ngaol. Naol lee-u phao, Maqkul bhai iqsanl hel leevq dei-eiq. Khul khi mail dai ngal-aq neq, aivq neq, ngal Miqyail nail ganl nl nail bhai tsao nl nia nail ngaol. 12 Duljil bhai neq, ngaq-i mail Eilpheilsu meenq bha bhi ail-a nail ngaol. 13 Naol lal-u phao, Daqlol meenq khe jaol nail Gaqphul jaol nail bhai ngaq-i mail bhi jiav-ail ceevq-a nail phailkhaog heelma khi haoqgavq juq oil lavq yaoq. A dai nee maqtsil, bavkov bhai gevq-ai thaq nail haoqgavq al juq, maq nioil peivq dai, oil lavq yaoq dei-eiq.

14 Bhajiq Aqleiqsaqdul neq, ngaq bhai haqev nail mee nia pha q nl lavq-a nail ngaol. Aivq-i mail nl lavq nail bhai geel-nvq dai, Heeqphaq Yeiqsul aivq bhai nl kovq bhiq nail ngaol. 15 Naol iqsanl aivq bhai yaolphaol yaoq. Khul khi mail dai ngal-aq neq, ngal cavq nail daoq bhai lav tsoiq deede nail ngaol.

16 Ngaq nail ganl iqmoeq-u phao yalkhaq dal duq bhai, ge kovq bhiq-u phao, tsaol-aq teevq gaq-ail ngal jaol nail phao maq jaol-ail. Tsaol-aq iqsanl mail ngaq bhai khaonq ha-a nail ngaol. Thailhai ngaol-aog, aqyu juq nail kovtavq bhai oeqbal thaq bhi kev lee dei-eiq. 17 Tsaol-aq iqsanl mail ngaq bhai khaonq ha lavq khi ngaol-aog,

ngal lavqkhiq tsail nail geeqlaoq daoq teevq bhee cavq bhi khi, jeq-e jaq-a iqsanl mail ya gaiq dai, Heeqphaq Yeiqsul ngaq-ai nee mail jaol khi, gaq bivq lavq thailthaiq nail ngaol. Alheel ngel-i mail, allaqjaqsil nail moeqthaoq lavqkhoel nee ngal ya jel ail-a nail ngaol. <sup>18</sup> Yeiqsul neq, haqev nail yaoq pha q yaoq-ao nee nail lavqkhoel ngaq bhai bhi jel-ail lavq nail nee ovqtavq, nqtavq milkhaoq lavqkhoel bhai ngal ya jaol lai-u phao kev dai, aivq ngaq bhai bhi jel-ail lavq nail ngaol. Nqmaq maqluv halyeel aivq bhai tsiqeeq yaoq. Aqmiq.

*Haoqnao naosaq khe daoq*

<sup>19</sup> Bhilgillav khi Aqgullav bhai maqkhaiq, Aoqneiqsiqphaol nail phaqaq maya q bhai maqkhaiq, ngal noeq moel naol geiq dai, cavq bhiq ail dei-eiq. <sup>20</sup> Eillaqdul neq, Gaolliqthu meenq bhai jaol-ail ceevq-a nail ngaol. Daqlolbheiq neq, nal nail ngel-i mail, Meiqleiqdul meenq bhai bhi jaol-ail ceevq-a nail ngaol. <sup>21</sup> Aqcoevq coevq nail yang maq kev lal-u phao nee mail, naol ngal jaol nail bha lal kivq dai, laijai yaoq. Ulbhullul, Phuldeiq, Lilnul, Gaqlaoldil khi aqivq jaqbheq Khali yaq iqsanl mail, naoq bhai noeq moel naol dai, daoq cavq cavq bhoel-ai leevq-a nail ngaol.

<sup>22</sup> Heeqphaq Yeiqsul naoq nail neema lavqkhoel bhai bhi jaol dei-eiq. Geeqlaoq eeljaol iqsanl, naoq nail kovtavq bhai bhi jiav dei-eiq.



**Jalliq aqsivq Gaolkheel daoq**  
**Akeu: Jalliq aqsivq Gaolkheel daoq New Testament**  
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
aaaba9fd-8172-55cc-ad15-906f43ddb5a5